

四明叢書

張宗祥



古今文派述畧

四明張氏約園開雕

序

壽鏞少時有志學爲文顧以齒稚於里中之賢豪往往慕其名而欲與之接無閒也歲丁酉初應秋試始識陳慥夫先生是科先生以拔貢膺鄉薦而壽鏞以不文罷迨癸卯壽鏞預鄉選先生極論吾文有春氣自此相交在師友閒者十有餘年歲丁未壽鏞再役漕務於燕而先生方銓授雲南恩安縣知縣同寓城東鄞縣館一日方盥沐畢忽相語曰理學經濟文章將屬於子子其勉之壽鏞瞿然曰何先生戲我如斯先生曰子讀陽明書

不釋手又留心朝章國故時時思學古文吾望於子深
矣壽鏞曰三者乃先生之所志先生著述其可示我乎
則答曰吾平生爲文隨手散漫不留稿非惟不留卽有
存者將一一焚之矣壽鏞曰此先生憤言也意者以爲
儒冠誤我乎先生笑曰我必如此我必如此戊申抵任
未三年而歸吏畏民懷歸而主吾郡中學及師範講席
病時欲焚詩文稿果如其所言其後忻君紹如輯四明
清詩略多方求之始得詩二首紹如謂未足其盡長者
是也壽鏞景仰先生求其遺著而輒不可得一日弟子

張令杭忽以其父振騷先生所注古今文振來曰此慷
夫先生在浙江第四師範學校編以教學子者也得之
狂喜因謂令杭曰先生不欲存其稿而今竟得之奇矣
盡讀其所述曰周秦曰兩漢三國曰兩晉六朝曰唐及
五代曰宋及金元曰明曰清斷代論文一一溯其源流
治理學經濟文章爲一鑪而以理勝詞勝判爲兩塗其
意尤獨重理勝此豈僅示學文者之塗徑雖老師宿儒
取爲借鏡之資無不可也乃知先生所以勉壽鏞者固
平日所自勉者矣昔歐陽子以一生盡心文字爲可悲

壽鏞則以爲可樂先生欲焚其稿者以爲可悲者也今取其稿刻之以爲可樂者也有時悲有時樂樂變而爲悲悲變而爲樂古今文士莫不皆然又豈獨壽鏞與先生哉起先生於九原而問之以爲何如先生未焚稿有磨兜鍪室詩文鈔藏於家他日更將刻之悵懷夙昔因書爲序且屬令杭告其父向非手錄焉而爲之注欲求斯稿豈可得耶民國二十五年二月後學張壽鏞

陳慷夫先生家傳

公諱康黼字次農號慷夫世居鄞城西郊之方伯第早歲失怙年二十爲諸生乃設家塾授徒奉母光緒丁酉以拔貢中式浙江鄉試勤治舉子業冀得祿以養親又好訓詁詞章之學有文名嘗數試禮部不獲售歲辛丑太夫人棄養時方戊戌庚子之後睹外侮日逼國勢亟亟乃幡然自悔因慷慨曰士生斯世安能復以文人自待而終其身耶方今和議初定舉國遑遑彼士之扼腕抵掌而談時事者惟知懾於外人之勢畏之懼之欣之

羨之於是競創標新領異之說徒求聳動當事固未能
洞明機勢而白操其應付之術者也可謂失其本矣乃
求古人經世之書及西歐政法史地之學悉心研治攷
求治亂得失之道以漸適平時會而期諸設施數年頗
有所得發爲文章詞雅義正尤能切中時敝旋任鎮海
鯤池書院山長及儲材學堂其後改爲寧波府中學教
席者數年丙午如京師更與二三同志相切礪居一年
授雲南昭通府恩安縣知縣戚友頗有以蠻荒僻遠止
其行者不顧毅然往戊申抵任所其地漢苗雜處風俗

凋敝號稱難治其民尤好興訟聽訟者率意爲之取斷而民之不平更甚往往連控不已致有累數年而不結者其地多盜賊出沒羣山中有司憚於捕治而盜風益熾公旣至周審民情嚴肅政令盡洗玩泄之習凡有控案必虛心研鞫旣得其情卽斷其是非曲直無不敬伏羣頌神明凡有報盜者必逮捕而嚴懲之耳目爲之一震凶頑於以斂迹行之數月獄訟清簡境內救平民大悅服次年兼護昭通府篆里有惡霸廣植黨羽氣焰張盛吏懼反噬莫敢窮治控牘累累輒置不問公旣攝行

府事乃詳爲訪察擬有以治之會有以殺牛滋事惡霸率其黨與鄉民械鬪且繫鄉民數人投控公立逮之數其罪有爲緩頰者告之曰某在不欲令民之受彼魚肉也今日釋之彼且上下結納以求漏網是縱獸而噬其民也或謂宜先詳省從而定讞焉曰不請命將獲譴然爲民除害何畏一身譴也卒殺之鄉民亦各按律治罪是歲之秋交卸府篆其明年鄰封以苛征滋事土匪蠡起奉命赴下邑乃誡其令曰亂起矣當有以弭之城尤不可無備以防不虞慎毋忽也遂返郡而其令顧以爲

不足爲患比抵郡而其縣失守之報至矣急設守禦而賊已臨城下矣乃閉城與知府提督率眾拒守日夜登陴督戰其地教堂林立亂旣起外人乃以保護教堂相聒因告之曰城若守教堂何害若以兵衛教堂是自擾也民且滋疑焉相處不以誠而欲假之以威徒取禍耳賊烏合圍必不久守城吾責城決無虞無用保護爲也外人感其誠深相信仰並願效力焉圍數日賊不支潰去散匿山中統兵提督某更率軍出城搜剿遂獲三十餘人返城欲以俘賊眾及獲酋邀功遽擬奏報公察知

皆係良民被誣執不可某恚曰是輩非賊賊當若何應
曰此百姓也民命不可輕期某三日當執賊歸某遂不
能屈次日率眾往果獲其魁並其羽黨數人械之歸一
鞠盡服立釋先被捕者某滋不懌訟其過於省會臬司
素忤公能因議譴事既平公以正道直行輒撓其志決
竟棄官遂攜篆晉省離郡之日民遮道焚香涕泣相失
曰吾民何幸得此賢父母今何不幸捨吾而去耶安得
重莅斯土復牧吾民耶至有請建生祠者焉既抵省力
求辭卸時總督合肥尙書李經羲識其才知非其罪語

人曰若陳某者固書生本色耳顧乃欲爲吏於今日非其時也其不協也宜矣因留省任高等學校及法政學校教席辛亥之春復以文字因緣受知於合肥尙書邀之入幕任爲文案司奏牘多所建白稱相得焉是年秋民軍起義滇垣於重九日響應一夜而事定時革命者多高等法政諸生咸欲推公出而任事不允月杪棄衣物乘閒離省人無知者經海道返鄞遂居家不復問世事公居官清廉家素貧而處之怡然繼應浙江第四中學及浙江第四師範之聘主經史古文講席採擷精要

闡明源流以啓迪後進卒年五十有五著有古今文派
述略摩兜鍵室文鈔遺言不許刻集今皆藏於家

古今文派述略目錄

周秦時之文派

兩漢三國時之文派

兩晉六朝時之文派

唐及五代時之文派

宋及金元時之文派

明時之文派

清時之文派

